

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na 32. sjednici Predstavničkog doma, održanoj 9. i 14. jula 2008. godine, i na 21. sjednici Doma naroda, održanoj 17. septembra 2008. godine, usvojila je

ZAKON

O DOPUNAMA ZAKONA O UPRAVNIM SPOROVIMA BOSNE I HERCEGOVINE

Član 1.

U Zakonu o upravnim sporovima Bosne i Hercegovine ("Službeni glasnik BiH", br. 19/02 i 88/07), u članu 7. iza stava 1. dodaje se novi stav 2, koji glasi:

"U upravnim sporovima pokrenutim protiv rješenja o stavljanju stranca pod nadzor odlučuje sudija pojedinac."

Član 2.

U članu 19. iza stava 3. dodaju se novi st. 4. i 5. koji glase:

"Izuzetno od stava 1. ovog člana, tužba protiv rješenja o stavljanju stranca pod nadzor podnosi se u roku od 24 sata od uručenja, odnosno dostave rješenja drugostepenog organa u upravnom postupku, odnosno proteka tog roka ako u njemu drugostepena odluka nije donesena. U sporovima iz ovog stava Sud odlučuje po hitnom postupku, saslušava stranca i sudsku odluku donosi što prije, a najkasnije u roku od 30 dana od dana podnošenja tužbe."

Izuzetno od stava 1. ovog člana, tužba protiv rješenja ili zaključka u predmetima povodom zahtjeva za međunarodnu zaštitu, uključujući i ograničenje kretanja podnosioca zahtjeva i predmetima koji se odnose na prestanak važenja međunarodne zaštite podnosi se u roku od 15 dana od dana dostave pobijanog konačnog upravnog akta, a u slučaju odbijanja zahtjeva za međunarodnom zaštitom kao neosnovanog u roku od osam dana od dana dostave rješenja. U sporovima iz ovog stava Sud odlučuje po hitnom postupku i sudsku odluku donosi što prije, a najkasnije u roku od 45 dana od dana prijema tužbe, odnosno najkasnije u roku od 30 dana od dana prijema tužbe u slučaju odbijanja zahtjeva za međunarodnom zaštitom kao neosnovanog."

Član 3.

U članu 20. u stavu 1. iza riječi "preporučeno" dodaju se riječi: "ili se podnosi preko organa uprave Bosne i Hercegovine kada je tako predviđeno zakonom".

Iza stava 6. dodaje se novi stav 7, koji glasi:

"Tužba protiv rješenja ili zaključka u predmetima povodom zahtjeva za međunarodnu zaštitu i predmetima koji se odnose na prestanak važenja međunarodne zaštite podnosi se preko Ministarstva bezbjednosti Bosne i Hercegovine."

Član 4.

Ovaj Zakon stupa na snagu osmog dana od dana objavljivanja u "Službenom glasniku BiH".

Predsjedavajući
Predstavničkog doma
Parlamentarne skupštine BiH
Niko Lozančić, s. r.

Predsjedavajući
Doma naroda
Parlamentarne skupštine BiH
dr **Mladen Ivanić**, s. r.